

## ﴿ KHUTBAH 4 ﴾

# HIKMAH DISEBALIK PENGHAYATAN IBADAH ZAKAT (2)

Dr. Yusof Jasmin @ Joseph Gimbad

الْحَمْدُ لِلَّهِ رَبِّ الْعَالَمِينَ وَالْعَاقِبَةُ لِلْمُتَّقِينَ وَلَا عُدْوَانَ إِلَّا عَلَى الظَّالِمِينَ،  
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهَادَةً تُنَجِّي قَائِلَهَا مِنْ  
عَذَابِ النَّارِ وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ، اَللَّهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ  
إِلَى يَوْمِ الدِّينِ.

أَمَّا بَعْدُ، فَيَا أَيُّهَا الْمُؤْمِنُونَ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.  
وَاتَّقُوا اللَّهَ وَاعْلَمُوا أَنَّ اللَّهَ مَعَ الْمُتَّقِينَ.

**Sidang Jemaah Yang Dirahmati Allah.....**

Terlebih dahulu khatib ingin berwasiat kepada diri sendiri dan para jemaah sekalian agar sentiasa meningkatkan ketaqwaan kepada Allah dengan beramal soleh dan mengerjakan segala perintah-Nya serta meninggalkan segala larangan-Nya agar kita mendapat kebahagiaan di dunia dan di akhirat. Allah s.w.t berfirman:

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ ؕ وَلَا تَمُوتُنَّ إِلَّا وَأَنتُمْ مُسْلِمُونَ ﴿١٠٢﴾

Maksudnya:

“Wahai orang-orang yang beriman bertakwalah kamu kepada Allah dengan sebenar-benar takwa dan janganlah kamu mati melainkan kamu dalam keadaan beragama Islam.”

(QS Ali-Imran [3] : 102)

**Kaum Muslimin Sidang Jumaat Yang Dirahmati Allah.....**

Dalam kesempatan pada kali ini, mimbar Jumaat akan membicarakan khutbah bertajuk “HIKMAH DISEBALIK PENGHAYATAN IBADAH ZAKAT.”

Ibadah zakat, disyariatkan oleh Allah s.w.t kepada kita, sepertimana ibadat-ibadat yang lain bertujuan menguji sejauhmana keimanan dan kepatuhan kita kepada Allah s.w.t, namun disebalik itu terkandung pula dengan hikmah-hikmah yang memberikan kesejahteraan kepada umat manusia samada di dunia ini mahu pun di akhirat kelak.

Untuk kita memahami dan menyedari sejauhmanakah signifikannya ibadah zakat ini dalam kehidupan kita, maka marilah kita sama-sama meneliti semula antara hikmah-hikmah disebalik penghayatan ibadah zakat.

**Pertama :** Ibadah Zakat, adalah berperanan untuk mensucikan harta daripada hak orang lain, serta menjadi penyubur kepada harta tersebut untuk terus berkembang dan bertambah dengan penuh keberkatan.

Satu perkara yang sering kali kita tersalah anggap ketika ingin mengeluarkan zakat dari harta kita, kita merasakan, harta kita itu akan berkurangan, tetapi perlu kita sedari bahawa, harta itu, bukan hak mutlak kita, ia hanyalah

anugerah Allah yang dititipkan kepada kita untuk diserahkan kepada pemilik yang berhak menerimanya. Oleh itu, kita tidak perlu bimbang untuk mematuhi perintah Allah, melaksanakan ibadah zakat, kerana Allah pasti akan menggantinya dengan lebih baik dan berlipat kali ganda jumlahnya nanti.

Keadaan ini jelas seperti Firman Allah s.w.t, dalam surah Yunus ayat 55;

أَعُوذُ بِاللَّهِ مِنَ الشَّيْطَانِ الرَّجِيمِ  
أَلَا إِنَّ لِلَّهِ مَا فِي السَّمَوَاتِ وَالْأَرْضِ ۗ أَلَا إِنَّ وَعْدَ اللَّهِ حَقٌّ وَلَكِنَّ أَكْثَرَهُمْ  
لَا يَعْلَمُونَ ﴿٥٥﴾

Maksudnya:

*“Ingatlah! Sesungguhnya segala yang ada di langit dan di bumi adalah kepunyaan Allah. Awaslah! Sesungguhnya janji Allah itu adalah benar, tetapi kebanyakan manusia tidak mengetahui.”*

(QS Yunus [10] : 55)

Dalam pada itu, Allah s.w.t juga menegaskan bahawa, segala apa yang ada di alam ini, yang menjadi sumber kekayaan kepada manusia, bukan hanya terjadi begitu sahaja, malah kesemua yang ada ini, sengaja dicipta oleh Allah s.w.t untuk digunakan oleh manusia bagi mencapai matlamat penciptaan-Nya di dunia ini. Perkara ini dijelaskan oleh Allah s.w.t dalam surah al-Baqarah ayat 29;

أَعُوذُ بِاللَّهِ مِنَ الشَّيْطَانِ الرَّجِيمِ  
هُوَ الَّذِي خَلَقَ لَكُمْ مَا فِي الْأَرْضِ جَمِيعًا ثُمَّ أَسْتَوَىٰ إِلَى السَّمَاءِ  
فَسَوَّاهُنَّ سَبْعَ سَمَوَاتٍ ۚ وَهُوَ بِكُلِّ شَيْءٍ عَلِيمٌ ﴿٢٩﴾

Maksudnya:

*”Dia lah (Allah) yang menjadikan untuk kamu segala yang ada di bumi, kemudian ia menuju dengan kehendak-Nya ke arah (bahan-bahan) langit, lalu dijadikannya tujuh langit dengan sempurna dan ia Maha Mengetahui akan tiap-tiap sesuatu.”*

(QS al-Baqarah [2] : 29)

Allah s.w.t juga bukan setakat menjadikan segala keperluan manusia untuk hidup di dunia ini, malah menundukkan segala apa yang ada itu untuk dimanfaatkan oleh manusia, seperti mana yang diingatkan oleh Allah s.w.t kepada kita pada surah al-Jaatsiyyah ayat 13;

أَعُوذُ بِاللَّهِ مِنَ الشَّيْطَانِ الرَّجِيمِ  
وَسَخَّرَ لَكُمْ مَّا فِي السَّمَوَاتِ وَمَا فِي الْأَرْضِ جَمِيعًا مِّنْهُ إِنَّ فِي ذَلِكَ  
لَآيَاتٍ لِّقَوْمٍ يَتَفَكَّرُونَ ﴿١٣﴾

Maksudnya:

*“Dan ia memudahkan untuk (faedah dan kegunaan) kamu, segala yang ada di langit dan yang ada di bumi (sebagai rahmat pemberian) daripada-Nya, sesungguhnya semuanya itu mengandungi tanda-tanda (yang membuktikan kemurahan dan kekuasaan-Nya) bagi kaum yang memikirkannya dengan teliti.”*

(QS al-Jaatsiyyah [45] : 13)

**Sidang Jemaah yang dirahmati Allah.....**

Lantaran itu, anggapan, ibadah zakat ini akan mengurangkan harta orang yang mengeluarkannya, adalah tidak benar sama sekali, malah perasaan itu adalah sebenarnya dicernakan oleh perasaan bakhil, perasaan tamak dan perasaan hasad dengki yang disuburkan oleh syaitan laknatullah. Malah, hakikatnya, apabila kita mengeluarkan zakat, akan menambahkan rasa syukur kita kepada

Allah, akan meningkatkan rasa tawadhu kita kepada Allah dan akan meningkatkan keyakinan kepada timbunan sumber kekayaan yang Allah sediakan untuk kita manusia. Perasaan yakin seperti ini akan menambahkan lagi kesungguhan kita mencari rezeki dengan lebih bersungguh-sungguh, dengan lebih berhati-hati dan dengan lebih tawakkal serta dengan penuh harapan kepada Allah, tanpa ada sedikitpun rasa putus asa.

Inilah yang dimaksudkan oleh Firman Allah ta'ala:

أَعُوذُ بِاللَّهِ مِنَ الشَّيْطَانِ الرَّجِيمِ  
وَإِذْ تَأَذَّنَ رَبُّكُمْ لَئِن شَكَرْتُمْ لَأَزِيدَنَّكُمْ<sup>ط</sup> وَلَئِن كَفَرْتُمْ إِنَّ عَذَابِي  
لَشَدِيدٌ

Maksudnya:

*“Dan (ingatlah) ketika Tuhan kamu memberitahu: "Demi sesungguhnya! jika kamu bersyukur nescaya Aku akan tambahi nikmat-Ku kepada kamu, dan demi sesungguhnya, jika kamu kufur ingkar sesungguhnya azab-Ku amatlah keras".*

(QS Ibrahim [14] : 7)

Demikian juga sabda Rasulullah s.a.w,

قَالَ اللَّهُ أَنْفِقْ يَا ابْنَ آدَمَ أَنْفِقْ عَلَيْكَ

Maksudnya:

*“Allah berfirman: “Berinfaqlah, wahai anak Adam. Nescaya Aku akan memberi infaq kepadamu.”*

(HR al-Bukhari)

Dalam hadis lain Rasulullah s.a.w bersabda,

وَلَمْ يَمْنَعُوا زَكَاةَ أَمْوَالِهِمْ إِلَّا مُنِعُوا الْقَطْرَ مِنَ السَّمَاءِ وَلَوْلَا الْبَهَائِمُ لَمْ يُمْطَرُوا

Maksudnya:

“Tidaklah suatu kaum enggan mengeluarkan zakat dari harta-harta mereka, melainkan mereka akan dicegah dari mendapatkan hujan dari langit. Sekiranya bukan karena binatang-binatang ternak, nescaya mereka tidak diberi hujan.”

(HR Ibnu Majah)

**Kaum Muslimin Yang Sama-Sama Berbahagia....**

**Hikmah yang kedua :** Zakat mensucikan dan membersihkan orang yang berzakat dari sifat kikir dan bakhil, membersihkan dirinya dari dosa dan kesalahan, serta membiasakan untuk berderma dan berinfaq di jalan Allah azza wajalla.

Ibadah zakat yang disyariatkan oleh Allah s.w.t berfungsi bukan sahaja sebagai baja penyubur kepada harta yang dizakatkan tetapi juga sebagai penyuci jiwa bagi orang yang mengeluarkannya. Menyuci jiwa dan hati seseorang dari sifat bakhil dan kikir, menyuci jiwa seseorang dari sikap tamak haloba dan terlalu cintakan harta dengan menjadikannya sebagai matlamat dalam kehidupannya.

Di dalam al-Quran Allah s.w.t banyak kali mengingatkan kita supaya, tidak tertipu dengan kenikmatan harta kekayaan yang kita perolehi. Seperti firman Allah s.w.t;

أَعُوذُ بِاللَّهِ مِنَ الشَّيْطَانِ الرَّجِيمِ

يَتَأَيُّهَا الَّذِينَ ءَامَنُوا لَا تُلْهِكُمْ أَمْوَالُكُمْ وَلَا أَوْلَادُكُمْ عَنْ ذِكْرِ اللَّهِ

وَمَنْ يَفْعَلْ ذَلِكَ فَأُولَئِكَ هُمُ الْخَاسِرُونَ

Maksudnya:

*“Wahai orang-orang yang beriman! Janganlah kamu dilalaikan oleh (urusan) harta benda kamu dan anak-pinak kamu daripada mengingat Allah (dengan menjalankan perintah-Nya). dan (ingatlah), sesiapa yang melakukan demikian, maka mereka itulah orang-orang yang rugi.”*

(QS al-Munaafiqun [63] : 9)

Kecintaan kepada harta ini memungkinkan kita terjerumus kepada kemusnahan, iaitu; kita akan lalai melaksanakan tanggungjawab yang diamanahkan oleh Allah kepada kita di dunia ini. Sehingga kita ingkar perintah Allah untuk mengeluarkan zakat kerana kluatir harta kekayaan yang kita miliki berkurangan. Allah s.w.t menggambarkan golongan seperti ini, sebagai golongan yang sangat mencintai harta sehingga mata hatinya buta serta tidak dapat melihat kebaikan dan manfaatnya, padahal harta kekayaan ini hanyalah sebagai alat yang Allah anugerahkan kepada manusia untuk merealisasikan tugasnya sebagai khalifah Allah di bumi ini.

Allah s.w.t menggambarkan golongan manusia ini, seperti dalam firman-Nya:

أَعُوذُ بِاللَّهِ مِنَ الشَّيْطَانِ الرَّجِيمِ

وَتُحِبُّونَ الْمَالَ حُبًّا جَمًّا

Maksudnya:

*“Dan kamu pula sayangkan harta secara tamak haloba!.”*

(QS al-Fajr [89] : 20)

Kecintaan harta berlebihan ini akan membawa kita kepada melampaui batas. Manusia akan sanggup memakan harta dan hak orang lain, menipu, mengurangkan timbangan kerana hati, dan perasaannya sudah diselimuti oleh cinta kepada harta yang berlebihan. Allah menggambarkan golongan manusia seperti ini dalam firman-Nya:

أَعُوذُ بِاللَّهِ مِنَ الشَّيْطَانِ الرَّجِيمِ

إِنَّ الْإِنْسَانَ لِرَبِّهِ لَكَنُودٌ ﴿٦﴾ وَإِنَّهُ عَلَىٰ ذَٰلِكَ لَشَهِيدٌ ﴿٧﴾ وَإِنَّهُ لِحُبِّ

الْحَيْرِ لَشَدِيدٌ ﴿٨﴾

Maksudnya:

“*Sesungguhnya manusia sangat tidak bersyukur akan nikmat Tuhannya dan sesungguhnya ia (dengan bawaannya) menerangkan dengan jelas keadaan yang demikian dan sesungguhnya ia melampau sangat sayangkan harta (secara tamak haloba).*”

(QS al-‘Aadiyaat [100] : 6-8)

**Sidang Jemaah Yang Dirahmati Allah....**

Untuk mengubati jiwa yang diselimuti oleh cinta kepada harta yang keterlaluan ini, kita perlulah mengikisnya dengan memaksa diri kita untuk mengeluarkan sedikit harta kesayangan kita itu untuk dijadikan zakat. Zakat dari harta kekayaan yang kita keluarkan itu, hendaklah kita anggap sebagai ibadah, sepertimana ibadah solat. Semoga dengan ibadah zakat ini, hati kita akan kembali segar dan akan sentiasa terdorong melaksanakan segala kebaikan serta amanah dan yang pastinya harta kekayaan kita akan sentiasa disirami dengan rahmat dan berkat serta akan bertambah subur jumlah dan kuantitinya.



أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا أَنْفِقُوا مِنْ طَيِّبَاتِ مَا كَسَبْتُمْ وَمِمَّا أَخْرَجْنَا لَكُمْ  
مِنَ الْأَرْضِ وَلَا تَيَمَّمُوا الْخَبِيثَ مِنْهُ تُنْفِقُونَ وَلَسْتُمْ بِءَاخِذِيهِ إِلَّا أَنْ  
تُغْمِضُوا فِيهِ ۚ وَاعْلَمُوا أَنَّ اللَّهَ غَنِيٌّ حَمِيدٌ ﴿٢٦٧﴾

Maksudnya:

“Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu dan janganlah kamu sengaja memilih yang buruk daripadanya (lalu kamu dermakan atau kamu jadikan pemberian zakat), padahal kamu sendiri tidak sekali-kali akan mengambil yang buruk itu (kalau diberikan kepada kamu), kecuali dengan memejamkan mata padanya dan ketahuilah, sesungguhnya Allah Maha Kaya, lagi sentiasa Terpuji.”

(QS al-Baqarah [2] : 267)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ  
وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ  
قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،  
وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.